



SAKSFRAMLEGG

Saksnr:	Utval:	Dato
	Bygdeutviklingsutvalet	

Sakshandsamar:	Arkiv:	ArkivsakID
Tore Henrik Øye	FA-V12, FE-223	23/1146

HANDSAMING AV SØKNAD OM BYGDEUTVIKLINGSMILDAR TIL SHERPATRAPPER I YKSENDALEN, BYGGJETRINN 2

Vedlagte saksdokument:

Søknadsbrev BU midlar 2023
KOSTNADSOVERSLAG STIBYGGJAREN DEL 2
Wordkart
Uttale trapper til Blånipa VT
Uttale trapper til Blånipa EIL

Kommunedirektøren sitt framlegg til vedtak:

Bygdeutviklingsutvalet løyver kr. 45 000,- i bygdeutviklingsmidlar til Stølsvegen Venelag for bygging av sherpatrappar på stølsveg/sti frå Kvile til Nesheimsnipa i Yksendalen (byggjetrinn 2)

Tilskotet vert løyvd som eit "fast" eingongsbeløp. Beløpet skal nyttast til tiltak som går fram av søknaden.

Det er ein føresetnad at naudsynte løyve etter aktuelle regelverk er innhenta før iverksetting.

Løyvd tilskot vert betalt ut etter innsending av sluttrapport, med betalingsoppmoding og kostnadsdokumentasjon. Det kan gjevast delutbetaling på inntil 80 %.

Løyvinga gjeld i to år, fram til og med 01.10.2025.

Saksopplysningar:

Samandrag/konklusjon (kort om saka)

Bygdeutviklingsutvalet har kr. 265 000,- kr. til fordeling ved søknadsrunden i september 2023. Samla søknadsbeløp er kring kr. 760 000,-, fordelt på 11 søknadar.

I søknad av 28.08.23 søker Stølsvegen Venelag om kr. 150 000,- i bygdeutviklingsmidlar til restaurering og utbetring av stølsveg/sti frå Kvile til Nesheimsnipa (Blånipa), ved å etablere sherpatrappar i regi av Stibbyggjaren AS. Total kostnad er budsjettert til kr. 2 360 000,-.

Søknaden utgjer byggjetrinn 2, der byggjetrinn 1, frå Yksendalen til Kvile, er gjennomført. Det vart løyvd kr. 75 000,- i bygdeutviklingsmidlar til dette byggjetrinnet.

Føremålet med tiltaket er å stimulere til ferdsle, friluftsliv og kulturformidling.

Det har skjedd ei stor auke i ferdsle etter trinn 1, og det er venta at utbetringa av stølsvegen/stien via Yksendalsstølen, fram til Nesheimsnipa, også vil føre til auke bruken i dette området.

Kommunedirektøren vurderer at restaurering av trinn 2 er i tråd med føremålet til bygdeutviklingsmidlane. Med utgangspunkt i retningslinene, innkomne søknadar og tilgjengelege midlar, vert det gjort framlegg om å løyve kr. 45 000,- til tiltaket, som eit «fast» tilskotsbeløp.

Bakgrunn for saka

Bygdeutviklingsutvalet har lyst ut ny søknadsrunde for Bygdeutviklingsmidlane, med kr. 265 000,- til rådvelde. Det kom inn 11 søknadar, med ein samla søknadssum på om lag kr. 760 000,-.

Målet med tilskotsordninga er å stimulere til opplevingar og aktivitetar som er tilgjengelege for «alle», og som skapar trivnad i bygdene. I dette høvet kan lag, organisasjonar, verksemder og einskildpersonar søkje om tilskot til prosjekt eller gjeremål med ålmennyttig føremål.

I søknaden av 28.08.23 søker Stølsvegen Venelag om kr. 150 000,- i bygdeutviklingsmidlar til restaurering og utbetring av stølsvegen/stien frå Kvile til Yksendalsstølen og Nesheimsnipa, omtalt som byggjetrinn 2. Byggjetrinnet byggjer på byggjetrinn 1, frå Yksendalen til Kvile, som er ferdiggjort.

Stølsvegen Venelag er ein friviljug organisasjon knytt til stølsvegen i Yksendalen. Laget skal arbeide for eit aktivt og naturvenleg friluftsliv, med vekt på lokal kultursoge og landskapskvalitetane, for å fremje rekreasjon og folkehelse. Ferdigstilling av byggjetrinn 1 har i dette høvet ført til auka ferdsle og bruk.

Restaureringsarbeidet skal gjennomførast av Stibbyggjaren As, ved bruk av sherpaer frå Nepal, som ved trinn 1. Kostnaden med arbeidet, inkl. mva., er budsjettert til følgjande:

- | | |
|---|-----------------------|
| • RIGG og DRIFT køyring, kost og losji, opp og nedrigging | kr 120 000,- |
| • HELIKOPTER TRANSPORT med tilflyging, big-bags og rundslings | kr 450 000,- |
| • KJØP av lokal stein 300 tonn med til køyring | kr 190 000,- |
| • STEINARBEID, 4 Sherpaer 1700 timer x 570.- | kr 970 000.- |
| • SUM KOSTNADSOVERSLAG BYGGJETRINN 2 eks mva . | kr 1 730 000. |
| • 25% MEDVERDIAVGIFT | kr 430 000. |
| • SUM KOSTNADSOVERSLAG BYGGJETRINN 2 - 2022 - inkl. mva. | kr 2 160 000.- |

Det går fram av søknaden at grunneigar er involvert i tiltaket, og at både Øvre Eksingedalen grunneigarlag og Vaksdal turlag er positive til tilrettelegginga.

I vedtak av 29.09.20 løyvde Bygdeutviklingsutvalet kr. 75 000,- til byggjetrinn 1, med grunngjeving i gjeldande retningsliner, jf. sak 20/2020.

Kommunedirektøren viser til søknaden for nærare informasjon om tiltaket (byggjetrinn 2).

Formelt grunnlag:

- «Retningsliner for tilskot til bygdeutvikling», vedtekne 26.05.20.

<https://www.vaksdal.kommune.no/innhald/landbruk-nering-og-skatt/bygdeutvikling/retningslinjer-for-tilskot-til-bygdeutvikling/>

Vurdering og konsekvensar:

Søknaden vert vurdert som tilstrekkeleg opplyst for sakshandsaming og vedtak etter gjeldande krav.

I følgje bygdeutviklingsmidlane sine retningslinjer, skal midlane brukast til ålmennyttige føremål og leggje til rett for aktivitet i bygdene, med varierte opplevingar og levande bygdeliv. I dette inngår mellom anna tilskot til materiell, utstyr og opprusting i samband med ulike prosjekt.

Kommunedirektøren vurderer at Stølsvegen Venelag sine planar om oppgradering av stølsvegen/stien frå Kvile til Nesheimsnipa, er i tråd med bygdeutviklingsmidlane sitt føremål, og dei verdiane som retningslinjene skal fremje.

Tiltaket handlar om å utbetre forholda for friluftsliv, og kombinere dette med kunnskapar om natur og kulturhistorie. Tilrettelegging skapar som nemnd auka merksemd om Eksingedalen som natur- og friluftslivområdet, der stadig fleire turgåarar får del i den flotte naturen som dalføret har å by på. Det er også eit mål om å knyte restaureringsarbeidet og tilrettelegginga til næringsutviklinga i dalen, gjennom ulike tenestetilbod, som reiseliv og liknande.

Erfaringane frå byggjetrinn 1 viser at etableringa av sherpatrappar har ført til større interesse for å gå tur i området, både frå bygdefolk og tilreisande, med gode tilbakemeldingar, der den auka ferdsla er handtert på ein god måte.

Byggjetrinn 2 vil gje ei ytterleg utbetring og tilrettelegging for ferdsle, der vurdering av andre verdiar knytt til naturmiljøet, skal takast omsyn til ved innhenting av nausdynte løyve frå anna lovverk.

Prosjektet er kostnadskrevjande, med krav til ekstern finansiering, der bygdeutviklingsmidlane utgjer ei relevant finansieringskjelde.

Ved handsaming av gjeldande søknad er det naturleg å trekkje inn det tidlegare tilskotet frå tilskotsordninga. Her vil det vere viktig at eit evt. nytt tilskot vil gå til utvikling av tiltaket, samstundes som ein ut frå tilgjengelege midlar, vurderer verknaden av tildelinga for andre søknadar/prosjekt.

Det vert som nemnd søkt om 150 000,- i tilskot, som er en liten sum i høve til total kostnad. Likevel er vurderinga at det ut frå innkomne søknadar og tilgjengelege midlar, ikkje er grunnlag for å løyve meir enn kr. 45 000,- til tiltaket. Samla tilskot frå Bygdeutviklingsutvalet vert då kr. 120 000,-.

Det tel positivt for ei løyving, at det er brei semje om tiltaket i dalføret.

Bygdeutviklingsmidlane sine retningslinjer seier at det skal takast omsyn til geografisk finansiering ved bruk av midlane, og at bygder som ikkje har fått midlar tidlegare, skal prioriterast. I dette høvet har dei aller fleste bygdene i kommunen fått tildelingar, som regel fleire gonger. Eksingedalen er blant dei stadene som har fått flest løyvingar, og det kom inn 3 søknadar frå dalføret ved gjeldande søknadsomgang. Dette er teke med i vurderingane ved sakshandsaming.

Kommunedirektøren føreset at eventuelle, formelle løyve til bygging er i orden før iverksetting.